

COMUNICATO n. 2535 del 18/09/2025

La mendranzes linguistiches de la Tèlia adum te Fascia

La Majon di Fascegn la fèsc 50 egn: n cedean che doventa simbol de dialogh, identità e colaborazion

[Ladino] L Istitut Cultural Ladin “Majon di Fascegn” l à fat festa per sie 50° cedean con doi dis de gran intensità, te chi che Fascia la é doventèda crousdevia de lengac, cultures e tradizions. N cedean de la comunanza ladina-fascèna che l à abù n valor nazionèl de gra a la partezipazion de la 12 mendranzes linguistiches storiches recognosciudes te la Tèlia: arbëreshë, catalegn, germanofons, grecs e grecanics, slovens, furlegn, croac del Molise, franzousc, francoprovenzai, ozitegn e sardi. “Chisc 50 egn de la Majon di Fascegn no l é demò n cedean, ma n simbol fort per duta la Nazion – l à declarà l assessor regionèl de la mendranzes linguistiches Luca Guglielmi – canche la mendranzes les se scontra e les fèsc rei les doventa protagonistes de la vita culturèla nazioneła, portan dant n message de colaborazion e dialogh. L é la desmostrazion che identità e tradizion no les se defen col se serèr, alincontra les se defen col se renforzèr tras l barat e la consapevoleza de sie valor”.

“La Majon di Fascegn la é nasciuda desche cèsa di ladins, ma te chisc 50 egn la é stata bona de doventèr ence n lech de confront e de crescimonìa spartida coi etres – l’ à sotriassà **Sabrina Rasom, diretora del Istitut Cultural Ladin “Majon di Fascegn”** – tor dant chiò duta la mendranzes linguistiches storiches de la Tèlia vel dir declarèr che la desvalivanza l é n melaur, e che demò col dialogh podon se pissèr n davegnir olache i lengac e la cultures de mendranza i abie n post recognosciù e valorisà deldut”.

“La Gran Festa da d’Istà de chest an l’ à moscià a na vida concreta cotant noscia comunanza la sie bona de starvardèr stolza sia reijes, col se averjer tel medemo temp a neva esperienzes e a neva cultures – l à dit **Edoardo Felicetti, Procurador del Comun General de Fascia** – la Majon di Fascegn la raprejentea n lech fundamentèl per l popul ladin e anché più che zenza per duta Fascia, percheche l ne ricorda che identità e azet i pel jir ensema”.

La scontrèda de en sabeda ai 13 aló da la Majon di Fascegn l’ à dat lèrga al confront su la endesfides e su la prospetives en comun de chesta comunanzes, con contribuc biné su tras na piataforma digitèla e con n laboratorie artistich-musical petrignous che à binà adum musizis ladins, croac del Molise e salentins.

L moment più spetà l é stat aboncont chel de en domenìa ai 14 de setember, canche la **Gran Festa da d’Istà de Cianacei** l’ à vedù te sia defilèda, apede ai ladins, ence la mendranzes linguistiches da duta la Tèlia, ogneuna con sia mondura, si simboi e sie patrimoniè culturèl.

Apede ai etres a la defilèda à tout pèrt ence la Presidenta del Istitut Cultural Ladin “Majon di Fascegn” Tea Dezulian, l ombolt de Cianacei Giovanni Bernard e la senatora ladina Elena Testor. Na defilèda da color e emozion che l à metù dant la richeza de la desvalivanzes, azetèdes e valorisèdes tel segn de l’ identità e del orgolie. Apede a ic ence i neves sentadins de Fascia, che i à portà dant la mondura tradizionèla de sie Paijes de naa, col sotriassèr che la cultures che se scontra l é na pèrt viva de la storia contemporanea de la Val.

Traduzion di Servijes Linguistics e Culturèl del Comun general de Fascia

Interviewes

(dc)